

14  
A C T A  
IN CONSISTORIO SECRETO

H A B I T O

A SANCTISSIMO DOMINO NOSTRO

P I O

DIVINÆ PROVIDENTIA


P A P A S E X T O

*Feria VI. Decembris MDCCLXXVIII.*

SOLEMNI DOMINICÆ NATIVITATIS DIE  
STATIM POST MISSAM PONTIFICALEM

IN BASILICA VATICANA

Prope B. M. V. de COLUMNA, & S. LEONIS MAGNI Altaria  
Qui locus nunc pro Sacrario est, nondum novo,  
quod construitur, absoluto.



R O M Æ, MDCCLXXVIII.

Ex Typographia Reverendæ Cameræ Apostolicæ.

A T O A  
IN CONSTITUTIONAL

OF THE

P L O

P A P A

OF THE

OF THE

OF THE



## VENERABILES FRATRES.



UAM bonum sit confidere in Domino, VENERABILES FRATRES, splendidissimum exhibet argumentum ea, quæ inter sævientes procellas aura prodiit securior, ob quam repletum est gaudio os nostrum, & lingua nostræ exultatione. *Iusta enim, & rationalis est causa gaudendi*, ait Leo Magnus, cum a *Sacerdotibus Domini ea gesta cognoscimus, quæ & paternorum canonum regulis, & apostolicis congruunt institutis* (1). Magno munere Divinæ Misericordiæ multiplicata sunt gaudia totius Catholicæ Ecclesiæ: quippe studio Venerabilis Fratris Clementis Wenceslai Archiepiscopi Trevirensis, & S. R. I. Principis Electoris, quem sine summa laude nominare non possumus, perniciosissimi errores extincti sunt, & in victoria veritatis dudum falsa dogmata perierunt. Non ignoratis plane quæ, & quantæ intulerit damna Joannes Nicolaus Episcopus Myriophytanus, Ecclesiæ Trevirensis Suffraganeus, cum ab Anno Millesimo septingentesimo sexagesimo tertio, sub e mentito Iustini Febronii nomine, Libros edidit, quibus, ut impugnaret hujus S. Sedis Jura, veritus non est Ecclesiæ ipsius Unitatem, dissolvere (2). Modo idem Archiepiscopus pro Religionis ardore, quo incensus est, pro pastorali, quæ maxime valet, virtute, suæque mentis præstantia, illum ipsum Febronium induxit ad solemnem errorum suorum Confessionem, & Retractionem. Plura, & gravissima sibi ab illo proposita veritatis argumenta cum Febronius exceperisset, serioque recogitasset, facile animadvertit se fuisse terrena opinione deceptum; & ut in Sacris est Litteris apprimè versatus, agnovit commentis suis obfiscere, atque adversari Christi Domini. Doctrinam, Patrum testimonia, Conciliorum Decreta, aliasque Ecclesiasticas Sanctiones. Ac tum etiam facile Nobis credimus, animo ejus obversatum esse quidquid in sacris Conventibus Trevirensibus Anno Millesimo quingentesimo quadragésimo nono habitis, quos ipsemet iterum prælo subici voluit (3), sanctum fuerat de tenenda, docendaque Romanæ Ecclesiæ doctrina, aliisque servandis Ecclesiasticis Juribus; quod perspicue agnovit nulla debere varietate corrumpi. Sed adfuit certe, eumque intime commutavit, illabens in cor mentemque Divinus Spiritus, ut repente Febronius lapsus, intelligeret, & ruinam sentiret atque desiceret. Tum, ut ad Patrem sapienter rediret, qui insipiens a Patre recesserat, cum statim retractasset, reje-

A 2

cif.

(1) *Epist. 36. part. 2. Oper. edit. Tyrnav. 1767.*

(2) *Libri Iustini Febronii prohibiti fuerunt Decretis Congregationis Indicis 27. Februarii 1764. 3. Februarii 1766. 24. Maij 1771. 29. Martij 1773.*

(3) *Hist. Trevirens. Diplom. auctore Jo. Nicolao ab Hontheim Episc. Myriophyt. tom. 2. pag. 740. edit. Augst. Vind. anno 1750.*

cisset, ac detestatus esset, quæ suis antea Libris scripserat; veniam a Nobis petiit, Apostolicæ Sedis clementiam imploravit, tamque promptum ac paratum ad præstandas omnes officii sui partes exhibuit animum, ut etiam si plurima jam accurate revocasset, cetera tamen omnia, quæ Nos adhuc emendanda esse censeremus, sine ulla cunctatione se correcturum promiserit. Sed præstat hæc ipsa, VENERABILES FRATRES, ex Archiepiscopi Litteris, & Febronii Retractione cognoscere, quæs Nostrarum ad Principes Epistolarum Secretarius recitabit. Ac primum audite Litteras.

*Sacrarium ingressus R. P. D. Benedictus Stay, Brevium ad  
Principes Secretarius, Cappa indutus, alia voce  
perlegit Litteras sequentes.*

**BEATISSIME PATER.**

**B**enedictus Deus & Pater Domini Nostri Jesu Christi, Pater Misericordiarum, & Deus totius consolationis, qui me consolari dignatus est in gravissima tribulatione mea, ut possem & ipse oppressum simili sollicitudine Sanctitatis Tue animum sublevare.

Magna nimirum tristitia mihi fuit, & continuus dolor cordi meo, dum viderem Suffraganeum ac Coepiscopum meum Nicolaum ab Hontheim, Virum tot ceteroquin nominibus mihi carum ac venerandum, utpote qui ob excellens & singulare ingenium, immensum omnigenæ eruditionis apparatus, longævam experientiam, mores a puero intactos, & fervidum restaurandæ disciplinæ, Ecclesiæque ampliandæ studium, præ alio quovis, oneri meo pastorali levando aptior esset, quique, nisi eum zeli amaritudo, & inconsiderantia in transversum egisset, Ecclesiæ bono, solatio, ac præsidio natus videbatur; dum, inquam, viderem Virum hunc terminos, quos posuerunt Patres Nostri, quia imo quos Patribus nostris Divinus Legises posuit, transilire, atque a veritatis tramite tanto longius, tantoque obstinatius aberrare, quo ipsum magis decipiebat species recti, & optimæ voluntatis consuetudo.

Interim tamen Scriptis suis Unitatem Catholicam scindebar, ad quæp reducere

Protestantes moliebatur; Zizaniorum extirpandorum prætextu, ex Agro Domini co evellerebat & Triticum; & fundatæ supra Petram Ecclesiæ ruinam parabat, dum illi etiam suppetias ferre cogitaret: Sed & adversus Sanctam, Catholico cuius non nisi cum Religione suspiciendam, Romanam Sedem attollere quandoque supercilium, ejus jura extendere, prærogativas obscurere, Jurisdictionem universalem, quam tota Antiquitas venerata est, e medio tollere, imo & ejusdem Sedis Præfules hinc inde probis confindere non dubitavit; eo nimirum, ut asserit, consilio, ut vigentes in Romana Curia abusus aboleret, Sedemque Divi Petri, sublaris adscitis, iisque monstris parergis, nativo suo splendori restitueret.

Ut autem omnia hæc tutius ageret, & parata fors remercitati suæ mala declinaret, ficto, Justini videlicet Febronii, nomine scripta sua vulgabat; & ita quidem caute, ut quamquam Authoris nomen, uti hominum neminem, ita nec me lateret, argumenta tamen desissent, quibus eum conscripti Operis convincerem. Sed & verbar, ne si eo hominem adigerem, ut Febronianorum Scriptorum se authorem fieri cogeretur, jam assecularum numero & Magnatum præsidio, adactione effectus, eo protervix procederet, ut infelicis Operis elucubratione optime se de Ecclesiâ, & veritate meritum esse contenderet; hucque

que ignis non jam lente, & clanculum, ut antea, sese diffunderet, sed disiectis repagulis, in vastissimum & nunquam forte amplius extinguendum incendium erumperet.

A Deo itaque Optimo Maximo consilium, auxilium, temporaque opportunitate expectanda esse duxi; quem in finem indignas quidem, at sinceras tamen & fervidas, cum gemitu Columbar, bonorumque omnium votis unitas preces ad cælum direxi; illius quoque frequenter interponens auctoritatem, sanguinem & merita, qui, quæcumque in Nomine ejus a Patre petituri essemus, ea nos consecuturos esse promissit.

Quam benignum, quamque inclinatam supplicationibus meis se præbuerit Consolator in se sperantium Deus, dignabitur Sanctitas Tua ex adjuncto Libello intelligere.

Prætermitto, ne longior sim, narrare, qua occasione dictum Suffraganeum meum Officii sui commovere inceperim; quibusque gradibus cum Divina clementia ad Sanctitatis Tuz pedes reduxerit.

Verum hoc, utpote virtutis eximie argumentum, in Venerabilis Senis laudem præterisse nefas foret; quod videlicet illum a primo instanti auspiciati inter nos negotii usque ad ejus consummationem, nunquam non humilem, docilem, modestum, & ad quævis jussa mea capefenda obedientem ac promptum expertus fuero.

Nec solum Sanctitati Tuz ad saniora consilia reversionem Authoris nostri animum dictus ejus Libellus exhibebit; sed & cum intimi solatii sensu considerandum fuit, quam humiliter cum Sancta Sede reconciliari postulet, imo quantum gratiam hanc promereatur & magnanimita errorum suorum Confessione, & amara pristina: rationis, factorumque minus rectorum poenitudine, & inconfutibili hodiernorum ejus sensuum Orthodoxia, & acri, quo modo incenditur, inlata Ecclesie damna reparandi desiderio.

Atque inde est, cur supervacaneam rem me acturum arbitrer, si Te rogem, San-

ctissime Pater, ut poenitenti paternum sinum pandas; neque enim dubitare fas est, quin illius Caritatem æmulis, qui super degeneri, sed jam converso Filio, misericordia motus, accurrens cecidit super colulum ejus, & osculatus est eum, eique cum Stola prima omnem paternum amorem reddidit.

Certe, si quidquid Tibi est in me benevolentie (& multoties probasti inesse quamplurimum) revertenti ad Te Carissimo Fratri meo exhibueris, & Viscera mea in Domino reficies, & incredibili me volupate perfundes.

Confidens in bonitate Tua, hæc duxi scribenda Tibi, sciens quod super id quod rogo facies; nec præteritarum modo ejus nozarum oblivisceris, sed & Filii loco eum habebis, amabis, Litterisque amicis & senium ejus solaberis, & animum adversus stolidam hominum judicia confirmabis: dignum quippe, & consentaneum Tuz clementie arbitror, ut qui suo erga Sanctam Sedem obsequio fines nullos posuit, eum illimitato prioris affectu Sanctitas Tua complectatur.

Transfusa jam in sinum Tuum, Beatissime Pater, suavissimorum solatii, gaudii, spei, ac fiducie sensuum exuberantia, superest, ut & coram Te deponam humillimæ ac profundissimæ subjectionis tributum, quo, quamdiu vixero, in persona Sanctitatis Tuz honorare intendo Venerabilem illam Petram, cui inædicatum se Ecclesiam suam Salvator promissit, & contra quam, haud secus ac Ecclesiam ipsam, nullæ unquam inferorum potestates prævalituræ sunt.

Cumque in persona Beatissimi Prædecessoris Tui Divi Petri, Apostolorum Principis, in Agnorum modo omnium, sed & Ovium Tibi cura concredita sit, provinciaeque demandata confirmandi Fratres Tuos; intolerabili fere, & viribus meis longe superiori duarum Ecclesiarum pondere quasi ad ima depressus, ad Te oculos, manus, vocemque attollo, suppliciter orans, ut facientem sub tot animarum regimine, de quarum singulis severo

Judici mihi olim reddenda erit ratio, animum allevare, carcutientem illuminare, aberrantem reducere, torpentem excitare digneris Consiliis, Jussis, ac praesertim plurimum valenti apud Deum Precatione. Quae omnia, ut Apostolica Benedictione mihi confirmare velis, vehementer a Te peto, qui finaliter me, gregesque mihi, utut indigno, commissos paternae Tuae benevolentiae commendans, filialemque re-

verentiam & amorem humiliter Sacrorum Pedum osculo proficiens subscribor

### SANCTITATIS Tuae

Ehrenbreitstein die 15 Novembris 1778

Devoits, & Obedientijs. Servus, & Filius  
Clementis Wenceslavi Archiepiscopus,  
& Elector

Nunc animos vestros ad Febronianam Retractionem advertite.

*Idem R. P. D. Sray legit Retractionem Episcopi Myriophytani, Suffraganei Trevirensis.*

### BEATISSIME PATER

SI quid mihi in longeva, & ad exitum declinante vita evenit triste & acerbum ( evenerunt autem haud pauca ); illud omnium maximum, & intima viscera penetrans est, quod per Reverendissimum, & Serenissimum Dominum Archiepiscopum meum, Pastorem vigilantissimum, ad me pervenit, Sanctitatem Vestram indignae ferre plura, quae in Libris Justini Febronii, seu quovis alio adscriptio nomine a me vulgatis, aut forte etiam mihi suppositis continentur, utpote Summae Sedis injuriosa, nec non supremis ejus Juribus detrahentia, proin Sanctae Nostrae Religionis ( sane praeter & contra meam intentionem ) noxia.

Cum autem nihil majus, & Viro bono dignius sit, quam agnitione errorum confiteri, & praeteritam culpam melioribus factis redimere; sic imprimis agnosco, & desileo errorem ex zelo indiffereto Protestantes Catholicae Ecclesiae, & Apostolicae Sedi reunienti, huncque in finem etiam usus, & praesentis particularium Ecclesiarum, eaque per se ultra modum exaggeratas, omnibus Ecclesiis applicandi studio, natum; neque eum, quoad vixero, desilire desinam. Dein deliberatum mihi constitutumque est, postquam culpam confessus,

& veniam gratiamque a paterna Sanctitatis Vestrae clementia simplex deprecatus fuero, sicuti jura & decorem Summae Sedis pro viribus tueri, ita & ejusdem Sanctae Sedis judicium Libris, & luminibus meis praefere, nullumque meum erga eandem submissioni ponere terminum. Eripuit mihi auctoritas Sanctitatis Vestrae ( in qua auctoritate Jesu Christi recognosco ) errorem. Itaque praesentes, eosque genuinos animi mei sensus de Statu Ecclesiae, & summis Sedis S. Petri, Apostolorum Principis, juribus, ad Successoris ejus Pedes omni cum submissione depono, tanquam in qua vivere & mori cupio. Sunt autem ii sequentes.

Imprimis profiteor & agnosco cum *Tourmelio*, Claves Ecclesiae, & uni Petro, & Unitati simul a Christo concessas esse, ita ut unum aliud non excludat. Oportebat quippe meminisse cum *Tersulliano*, in *Scorpiaco Cap. 10.*, *Eas Dominum Petro, & per eum Ecclesiae reliquisse*; & cum *Optato*, de *Schisma Donatist. lib. VII. n. 3.*, *Petrum Claves Regni Caesorum communicandas ceteris solum accepisse*; ut enim de Petro ait *S. Leo*, *Serm. III. in Anno.*, *Si quid ( Christus ) cum eo communi ceteris voluit esse Principibus, nunquam nisi per ipsum dedit quicquid aliis non negavit*: Scilicet Claves datae sunt uni Petro,

tro, quatenus ille Primatum & regiminis potestatem accepit a Domino, idemque Personam totius Ecclesie, ceu Supremus ejusdem post Christum, & sub Christo Rector ac Moderator, gerebat. Datæ quoque sunt Unitati, idest in bonum Unitatis, & Petro præcipue, ut dictum est, & aliis etiam Apostolis, eorumque Successoribus Episcopis, quibus docendi, ac regendi ministerium & potestas, seclusa plebe, commissæ sunt in verbis: *Sicut me misit vivens Pater, & ego mitto vos. Accipite Spiritum Sanctum; quorum remisistis peccata &c. Euntes docete omnes Gentes &c. Attendite Vobis, & universo Gregi, in quo Vos Spiritus Sanctus posuit Episcopos regere Ecclesiam Dei*: Attamen cum dependentia a Petro, & cum subordinatione ad ipsum, qui eas, ut superius ait S. Optatus, communicandas ceteris solus accepit. Explodendus proinde error, haustrus ex Protestantium fontibus, Ecclesiam Collegium esse, non Societatem, ut Catholicæ sentiunt, in qua baptizati fideles ex institutione Christi sub legitimorum Pastorum, ac præcipue Summi Pontificis, regimine degunt; cujus regiminis potestas, a Christo constituta, veram subjectionis, & obedientie obligationem multitudini seu universitati imponit.

Profiteor Dei Filium, dum suam Ecclesiam fundare, eamque esse unam vellet, formandæ ac regendæ huic Unitati Primatum in illa instituisse; huncque S. Petro commississe. Firmiter assero cum SS. Patribus Cypriano, Hieronymo, Optato Milevitano, Gregorio Nazianzeno, Joanne Chrysostomo, Ambrosio, Leone M., Gregorio M. & aliis, propterea inter duodecim Apostolos unum electum esse, ut Capite constituto, super quo Ecclesia fundata est, Schismatis tollatur occasio: Ideo Christum, cum suis Apostolis potestatem largiretur, ab uno, cui Primatum tribuit, coeppisse, ut unam Ecclesiam, & unitatem Cathedre, simulque unitatis originem demonstraret: Schismaticum esse, qui, ut ait Optatus, contra singularem Cathedram aliam collocat, vel ab ejus communionem per obe-

dientie negationem recedit: Non habere Petri hereditatem, qui Petri Sedem impia divisione discepit; siquidem ubi est Petrus, ibi est Ecclesia: Petrum Ecclesie fundamenta, (Apostolos, sibi ut Capiti subordinatos) in fidem suam recepisse: Eidem Petro, in quo Primatus excellenti gratia præminet, ipsorum etiam Apostolorum curam a Christo esse commissam: Ipsum esse Os, & Principem Apostolici Cætus.

Assero hunc Primatum (qui non Ordinis, inspectionis ac directionis tantum est, sed & veræ Auctoritatis ac Jurisdictionis) quia non minus, quam Unitas ipsa, pro cujus conservatione, ac regimine institutus est, perpetuus esse debebat, in Petri Successores Romanos Pontifices, Sedemque Apostolicam, hujus Unitatis Centrum, & Radicem, jure Divino transisse, ut nulla ratione transferri a Romana ad aliam Sedem valeat: Ad hanc Ecclesiam propter potiorem principalitatem (id est, propter supereminentem ejus dignitatem atque auctoritatem) uti ait S. Irenæus, necesse esse omnem convenire Ecclesiam, hoc est eos, qui sunt undique, fideles: Eam esse Caput Ecclesiarum, a qua, ut inquit Bonifacius Papa I., quisquis se abscondit, fit a Christiana Religione extorris. Huic accedunt Patres Concilii Constantinopolitani IV. Sequentes, ut ajunt, in omnibus Apostolicam Sedem, & observantes omnia ejus Constituta, speramus, ut in una Communionem, quam Sedes Apostolica prædicat, esse mereamur, in qua est vera & integra Christiana Religio sollicita; promittentes etiam, sequestratos a Communione Ecclesie Catholice, idest, non consentientes Sedi Apostolicæ, eorum nomina inseri Sacra non recitanda esse Mysteriorum.

In horum sequelam cum Patribus Concilii Œcumenici Florentini agnosco, Romano Pontifici in B. Petro pascendi, regendi ac gubernandi Universalem Ecclesiam a Domino Nostro Jesu Christo plenam potestatem traditam esse. Sicut autem pascendi, & regendi potestas sine conveniente Auctoritate, Jurisdictione, ac Coactione (ad quam etiam, velut gravissima Spi-

ritualis prena, pertinet Excommunicatio, quoad fructum & suffragia generalia separans) subiliter non potest; sic talem a Christo ipso promanantem in Romano Pontifice, tanquam Universalis Ecclesie Capite, Principe, ac Magistro residere affirmo.

Profiteor quoque Romanum Pontificem esse summum Judicem Controversiarum in rebus Fidei & Morum, ac in omni ejusmodi Controversia exorta, hinc inde dissentientibus animis, tum maxime audientem vocem *Hieronymi*, scribentis ad *Damasum*: *Ego Beatitudini tuae, id est, Cathedrae Petri communione confector: Super illam Petram aedificatam Ecclesiam scio. Quicumque extra hanc Domum Agnum comederit, profanus est. . . . Non novi Vitalem, Melitium responso, ignoro Paulinum; quicumque tecum non colligit, spargit. Et: Adhuc in tres partes scissa Ecclesia ad se rapere me sollicita. . . . Ego interim clamito: Si quis Cathedra Petri jungitur, meus est.*

Addo speciatim adversus errorem tum veterum, tum recentiorum Novatorum, qui sprete multitudine Episcoporum, Capiti suo Romano Pontifici expresse, vel tacite adhaerentium, Ecclesiam, ac veritatem in sua paucitate concludere non verentur, fieri non posse, ut a vero aberret Corpus Episcoporum, qui Capiti suo Romano Pontifici adherent: Sic haeresim Lutheri jam ante Concilium Tridentinum ab Ecclesia, praecunte Pontifice, per ejus oraculum ultimatum & irrevocabiliter damnatam fuisse; quandoquidem Ecclesia Capiti unita, sive per Orbem Universum dispersa, sive congregata in Conciliis Generalibus (in quibus Episcopi jure proprio ac judiciaria potestate sibi ex institutione Christi cohaerente una cum Summo Pontifice definiunt) in dictis Causis definiendis errare non possit, nec ab ea Cathedra discedere, ad quam, teste *Cypriano*, perfidia non valet accedere, & in qua, manente dispositione veritatis, B. Petrus in accepta fortitudine Petre perseverans Ecclesiae gubernacula non relinquit, ne per Successores suos sedere, ac loqui non desinit.

Agnosco pariter datam Ecclesiae a Christo auctoritatem judicandi de sensu, seu doctrina Propositionum, Librorum & Authorum, ac fideles compellendi ad subscribendum suae Sententiae; hos praeinde teneri eidem acquiescere interna mentis & judicii adhesionem, non solum religioso, ut vocant, silentio; atque hujusmodi Judicium nullatenus errori esse obnoxium. Constitutioni *Unigenitus*, ut dogmatico Sanctae Sedis Romanae & Universalis Ecclesiae Decreto, omnimodam ab omnibus obedientiam deberi affirmo.

Dico cum *Avito Viennensi Episcopo*, in rebus, quae ad Ecclesiae statum pertinent, si quid dubitationis fuerit exortum, ad Romanam Ecclesiae Maximum Sacerdotem, quasi ad Caput nostrum, esse referendum.

Circa Decretales Romanorum Pontificum Epistolas, profiteor cum SS. *Gelasio & Leone*, eas venerabiliter suscipiendas esse, & sancte custodiri debere.

Affirmo Romano Pontifici jure divino competere jus indicendi, dirigendi, & confirmandi Universalia Concilia, quae per ejus concursum plenam sortiuntur firmitatem, & infallibilitatem, independentem a quacumque alia acceptance.

*Concilium Tridentinum* non tantum in Causis Fidei, sed etiam Disciplinae liberum fuisse profiteri, non obstante, quod pro illorum temporum & rerum circumstantiis in eadem Sacrosancta Synodo non potuerint omnia de quorundam etiam proborum Virorum voto ac desiderio reformari. Causas Criminales Episcoporum per Concilium Tridentinum Sess. XXIV. Cap. 5. Summo Pontifici, & Apostolicae Sedi merito reservatas judicio. Cumque eadem Sacra Synodus, Sess. XXIV. cap. 1. declaraverit, Pontifices Maximos, pro suprema potestate sibi in Universa Ecclesia tradita, Causas aliquas Criminum graviore merito potuisse suo peculiari judicio reservare, non arbitror licere apertam hanc Synodi declarationem eludere, aut obliquis & coactis interpretationibus overtare, quasi haec potestas Summo Pontifici non competere proprio, ac originario, divinoque jure. Habet.



Habet proinde idem Pontifex, & jure exercet in Univerſa Eccleſia poteſtatem Diſpenſandi ex legitima cauſa in lege per Generale Concilium lata.

Primis jam tum Eccleſiæ temporibus ii cenſebantur Spurio, adulterinque Epifcopi, quorum Romanus Pontifex Ordinationem, ſeu Electionem abſolute reſpueſet, veluti *ULTRAJECTINORUM Pſeudo-Epiſcoporum*, aliorumque eidem Communioni, atque Cauſæ adhærentium. Quamvis autem antiquioribus temporibus Confirmatio, & Conſecratio Neo-Elektorum Epifcoporum ad Provinciales Synodos, præcipue vero ad Metropolitanaum pertinuerit; attamen legitimis de cauſis hæc diſciplina per Univerſum Occidentem mutata fuit, neque priſtinam hac in parte diſciplinam reduci poſſe exiſtimo, niſi de pleno atque libero Summæ Sedis aſſenſu. Idem de Translationibus, & Depoſitionibus Epifcoporum, nec non de Electionibus novarum Sedium Epifcopalium ſervandum judico.

Canonizatio Servorum Dei per Papam *Alexandrum III.*, ad evitandos innumeros abuſus, ſoli Romano Pontifici, ſeculiſ Epifcopis Diœceſanis, merito reſervata eſt. Quamquam & ab antiquioribus temporibus, ut habetur ex *Benedicto XIV. Lib. 1. de Beatif. & Canon. Serv. Dei, Cap. 10. n. 1.*, Beatificationes ipſæ, quæ fiebant ab Epifcopis, vim obtinebant Canonizationis, vel per expreſſam Summi Pontificis approbationem, vel per univerſalem, extra Concilium, Eccleſiæ conſenſum, in quo tacita Summi Pontificis approbatio continebatur.

Quamvis olim vix aliæ Cauſæ, quam Majores, ex Provinciis ad Romanam Curiam deferrentur, attamen hodie in reverentiam Summæ Sedis, ac pro Suprema poteſtate eidem in Univerſa Eccleſia divinitus tradita, legitimo communique uſu invaluit, ut in quibuſvis Cauſis Eccleſiaſticis ad Summum Pontificem appelletur, ita ut ejusdem Sanctiſſimi authoritate in ſuprema inſtantia judicaretur, tum Romæ per Judices Ordinarios ibidem conſtitutos, tum per Delegatos in partibus, pro diver-

ſitate locorum, morum, & Concordatorum.

Summi Pontifices *Pius II., Julius II., & Gregorius XIII.* omni jure damnarunt Appellationes a Papa ad futurum Concilium, cujus damnationis cauſas ſuis Conſtitutionibus explicant. Sane jam antea reprobataſ comperimus a *Gelaſio* Appellationes a Sede Apoſtolica: *Siquidem ad illam de qualibet Mundi parte Canones appellare voluerint; ab illa autem nemo ſit appellare præmiſſus.*

Equidem primævæ Eccleſiæ uſu omnia Beneficia ad Epifcopi, tanquam Ordinarii Loci, diſpoſitionem, ſeu collationem perſequebantur; attamen cum ſanæ rationis ſit, ut Summus & Univerſalis Pontifex plurimum in Provinciis gratiarum diſpenſator exiſtat, ſic minime injuſtæ, imo huic Summi, & Univerſalis Pontificis qualitati conſonæ fuerunt Beneficiorum Reſervationes, quæ deinceps Nationum Concordatis firmatæ, & reſpectively moderatæ ſunt. Hæc Concordata, uſpote vim pacti habentia, religioſe omnino ſervanda ſunt. Declararunt autem ſæpius Romani Pontifices, ſignanter *Gregorius XIII.*, longe a ſuo Animo abeſſe Concordatorum, nominatim Germaniæ, infractionem.

Annatæ ad ſublevandas neceſſitates Romanæ Curie, pro omnibus Eccleſiis excubantis, laborantis, & ſumptus portantis, pro legitimis habende; atque ut tales, eo ſaltem uſque retinende ſunt, donec alia æque commoda ratione, Apoſtolice Sedis judicio, ſuſtentioni, atque innumeris oneribus ejusdem Curie proviſum fuerit.

Exemptio Regularium (quorum magna in Eccleſia eſt utilitas), eorundemque immediata ſubjectio ad Apoſtolicam Sedem, legitimis ex cauſis, in bonum nontantum Religioſorum Ordinum, ſed etiam Univerſalis Eccleſiæ, videlicet ad faciliorem eorundem ſub uno Supremo Capite gubernationem, introducta, & ab omnibus Eccleſiis agnita, nedum a Seculari poteſtate, ſed nec ab una particulari Synodo abrogari valet. Abuſibus, ex hac Exemptione naſci valentibus, per Concilium

*Tridentinum* occursum & provisum est .

Scio Episcopos non ab Ecclesia, seu fidelium Universalitate, sed a Spiritu Sancto positos, ut commissos sibi Greges intra suas solum Dioeceses pascant & regant, cum debita ad Romanum Pontificem subordinatione . Quamvis autem illi primis Ecclesie temporibus ampliorem, pro varietate disciplinarum, in his quæ jurisdictionis sunt, potestatem exercuerint; potuere tamen Canones ejus usum intra strictiores terminos coercere, quos privata autoritate extendere nefas foret .

In illis, quæ ad Fidem, Sacramenta, & Ecclesiasticam Disciplinam pertinent, potestas Ecclesiastica pleno jure decernit, sine concursu potestatis Civiles; ratione tamen mentis Protectionis, quam sibi invicem debent, ad hanc spectat, juxta mentem Ecclesie, & quantum ipsa optat, ejus Canones protegere, & exequendos curare per media temporalia .

Finaliter judico, curandum omni legitimo ac meliore modo, ut pax & concordia inter Ecclesiam, & Rempubicam perpetuo retineatur; atque adeo, quoad Fides & Religionis jura patiuntur, vitandas esse occasiones offensionum, unde & dissidia oriri, & gravia mala in Religionis decorem timeri possent .

Accipe, SANCTISSIME PATER, has Assertiones, velut tesseram genuinæ meæ sententiæ de divinis, atque eminentioribus Tuis, Tuxque Sedis juribus, tanquam monumentum revocationis omnium, quæ adversum ea, & si quæ fortasse alia veræ doctrinæ Capita, seu universalis Ecclesie jura ( licet præter intentionem ) a me quavis via, aut modo dicta, scriptave fuerint, vel scripta videri possent .

Si quid ultra est, quod circa Fidei, seu Doctrinæ meæ professionem ac declarationem, quam in omnibus Sanctæ Romanæ, atque Apostolicæ Ecclesie conformem esse cupio, jubes, aut postulas; habebis me semper ad eandem germana sinceritate edendam obedientem ac promptum, Non negabis interim ( sic humillime confido ) veniam erranti; qui medias etiam inter deviationes, nihilominus cum Patribus Concilii *Lateranensis* semper agnovit, & quoad vivet, agnoscat, Romanam Ecclesiam, disponente Domino, super omnes alias ordinariæ potestatis obtinere Principatum, utpote Matrem Universorum Christianifidelium; qui cum *Divo Bernardo* sine fraude & furo proficitur: Esse alios aliis assignatos Greges, singulis singulos; Tibi universos, uni usum, non modo Ovium, sed & Pastorum, tanquam uni omnium Pastori; qui cum *S. Hieronymo* non ignorans Romanam Ecclesiam supra Petram, qui Christus est, ædificatam, nihil magis desiderat, quam Cathedræ Petri ( qui etiam *per Christum factus est Petrus*, ut ait *S. Maximus Taurinensis* ) perpetuo consociari . Suscipe me in hanc Unionem; redde poenitenti filio paternum affectum; & in pignus hujus gratiæ da jacenti ante Sacros Pedes Tuos, eosque deosculanti, Apostolicam Benedictionem

#### SANCTITATIS TUE

Treviris 1. Novemb. 1778.

Humillimo & Obedientissimo Filio  
Joanni Nicolao ab Hontheim Episcopo  
Myriophytano, Suffraganeo Trevi-  
rensi M. propria .

Noftras modo in forma Brevis Litteras , quibus ad utrumque refpondimus , audietis .

*Postremo ab eodem lecta sunt Epistola Sanctitatis Suae  
ad utrumque .*

Venerabili Fratri Clementi Wenceslao Archiepiscopo Trevirensi &  
Episcopo Augustano , S. R. I. Principi Electori .

PIUS PAPA SEXTUS.

Venerabilis Frater , Salutem & Apostolicam Benedictionem . Nihil nobis gratius , atque acceptius Tuis Litteris contingere unquam potuit , Venerabilis Frater ; nihil iis , quae Nobis ipsae attulerunt , exoptatius : Incredibile est , quanto inde , quamque immenso repleti gaudio sumus : idque Tu ipse magis ex Tuo laetitiae sensu existimare poteris , quam Nos ullis Tibi significationibus exponere valeamus . Illo , quem nunciasti , successu , illo , quem transmissisti , *Retractionis* Libello , gravissimam detraxisti Nobis , quae jamdiu Animo infixata erat , de *Febronianis* Scriptis sollicitudinem ; quantumque antea de illatis illinc in Ecclesiam damnis dolebamus , tantam nunc in spem inducimur fore , ut iis ipsis Scriptis jam a suo Auctore repudiatis , abdicatis , ac damnatis , accepta detrimenta sarciri tandem ac resciri videamus . Hunc a Deo ipso rei exitum eo magis expectamus , quo magis illius Digitum , Cor hominis altissime pervadentem , atque immutanter agnoscentem . Tuos ille sermones , cum Episcopo Myriophytano Suffraganeo Tuo a Te habitos , Tua in ipso ab errandi via deducendo consilia , Tuas actiones pro sua gloria , atque Ecclesiae utilitate susceptas sui Spiritus afflatu moderabatur , sua ope praesidioque muniebat , opportunitatesque omnes , & differendi , atque agendi tempora sapientia sua gubernabat . Illi igitur , qui dives est in misericordia , summae immortalisque habendae sunt a Nobis gratiae , quod & Tua vota , stu-

dia , ac labores , & Noftras non intermissas preces , ac lacrymas in Cordis humilitate ad eum fufas , tam liberaliter , tam benigne tandem respexerit . Verum cum ab ipso Tua fuerit opera , tamquam suae miserationis instrumentum , adhibita , ipsam hanc tam egregiam , tamque excellentem operam ac Virtutem Tuam intima Animi Nostri comprobatione prosequimur , atque in Coelum extollimus ; Tibique , Venerabilis Frater , ita gratulamur , ut nihil unquam a Te in Tuo Episcopali munere neque gloriosius , neque utilius suscipi , atque effici potuisse Apostolica voce praedicemus . Summa esse Tua fatemur de Nobis , de Sancta hac Sede , Ecclesiaeque Universa merita , ac maxima inde , nec unquam interitura accessisse ad pristinam Tuam laudis ac splendoris amplitudinem veræ solidæque gloriae ornamenta . Hæc eximia Nostra de Te judicia pari etiam gratissimi Animi testimonio , summique in Te amoris , exultationis , ac studii declaratione cumulamur . Proinde quod Tu nunc a Nobis vehementer exoptas , atque efflagitas , ut Venerabilem Fratrem Joannem Nicolaum Episcopum Myriophytanum jamdiu aberrantem , ac ad Nos modo revertentem , in gratiam , benevolentiamque Nostram restituamus , magnopere quidem gaudemus in eo , quod Nostra Animi inductione cupidissime praestituri sumus , una etiam Nos esse Tuo huic gravissimo postulato praeclare satisfacturos . Itaque omnia , prout fieri a Nobis cupis , ab ipso antea in Apostolicae hujus Sedis Ecclesiaeque Jura perperam atque inconsulte dicta ,

etc ,

ſta, ſcripta, aſtaque ex Animo remitti-  
mus, condonamus, atque ignoſcimus; ad  
eaeque reſpiciamus, quæ nunc conſecuta ſunt,  
quæ nimirum a Te, atque ab illo ipſo  
etiam de præſenti ſuo Animi ſenſu ad Nos  
deſerunt; eundem in paternæ Caritatiſ  
ſinum, atque in complexum Noſtrum li-  
benter, amanterque recipimus, ac tam-  
quam inventam Ovem, quæ perierat, hu-  
meris Noſtris imponimus, atque ad hanc  
ſolidiſſimam Veritatis Petram læti exultan-  
teſque reportamus, ac inter ceteros Cœ-  
piſcopos Fratres, itemque Filios Noſtros  
adnumeramus; & quo amplius habeat pa-  
terni huius Amoris, lætitiæque Noſtræ ar-  
gumentum, non mediocri etiam laude, &  
commendatione hanc ipſius actionem exor-  
namus. Commendari enim oportere a No-  
bis intelligimus ejus cum ingenii docilitate  
conjunctam Animi fortitudinem, quæ in  
ſuo hoc factō perſpicue conſpicitur atque  
eminet, dum illas ſuas, quas tantopere  
adamarat antea, propugnaratque Senten-  
tias, abjicit nunc, ac deſertit, dum plu-  
rimorum huic Petri Cathedræ aut adver-  
ſarium, aut invidentium, quos undique  
in ſuas partes laudeſque petraxerat, judiciis,  
non retrahitur, non permovetur. Quid hoc  
eſt, niſi quodammodo pro veritatis, quæ  
aſſuſe, amore ſemetipſum conſternere;  
ex Saulo novum in ſe Paulum expri-  
mere; de ambitione, de ſui laude, de pro-  
ſani Sæculi huius aura fortiter, egregieque  
triumphare? Quo certe humanæ Naturæ  
imbecillitas perſingere non poteſt, niſi di-  
vina ope ſulta, ac roborata. Divinæ igitur  
voluntatis rationibus inhærere Nos pa-  
tamur, dum eundem ſingulari laude pro-  
ſequimur, quæ poſſiſſimum in Dei ipſius  
gloriam eſt redundatura. Idcirco jam nunc  
ipſi amantiſſimis reſpondemus Litteris, quas  
hiſce conjunctas ad Te tranſmittimus; in-  
ſiſſique intinæ reſpiciationis, gratiæ, lau-  
dationiſque Noſtræ teſtem Apoſtolicam Be-  
nedictionem ex animo concedimus. Ut  
autem ad Te regrediamur; Venerabilis  
Frater, ita tua hac virtute, tuæque felici-  
tate gaudemus, ut plurimum ob ipſum

etiam tam ſingulare, tamque præſans  
exemplum, in Te ſplendoris, in Apoſto-  
licam Sedem utilitatis adjuncſtum in cumu-  
lum judicemus. Maximo enim exemplum  
illud ceteris omnibus Episcopis incitamen-  
to ad Sacra tuenda, & propugnanda Jura  
ſuturum conſidimus. Eos vero acerrime po-  
terit ſua claritate ac luce ad imitationem  
impellere, quibus ob locorum propinquitatem  
erit ipſum multo conſpectus; quibuſque  
deſſe jam hoc tempore non poteſt  
ejuſmodi exhibendæ, exercendæque virtu-  
tis copia. Nunc vero, eſti Te ipſum im-  
poſterum Tui ſimilem futurum non du-  
bitemus, valdeque lætemur nulla Te ho-  
tatione indigere, qui tua ſponte ad præ-  
clara quæque inflammariſ; tamen ut ma-  
gis Tibi conſtare poſſit, quantum adhuc  
tua virtute nitamur, illud nunc a Te ex-  
pectamus, ut quem a Deo recepit Suffra-  
ganeus tuus docilitatis ſpiritus, eodem pro  
tua apud ipſum auctoritate velis uti ad  
debitam ab ipſo exigendam, quam pro-  
miſit, operam, qua illud errorum propu-  
gnaculum, quod jampridem excitavit, idem  
ipſe ſui ingenii, ſuæque doctrinæ ope deſi-  
cere, ac funditus delere pergat; ex quo  
certe præcipuum ipſi illi Retraſtationi ſuæ  
pondus adjungetur: Tecum præterea San-  
cti Leonis Magni adhibemus ad Theodo-  
retum, Cyri Episcopum, ſcribentis ver-  
ba (1): *Victoria, quam Chriſtus Dominus  
Noſter ſua donavit Eccleſiæ, quamdiu in  
hoc Munda verſamur, licet fiduciam ma-  
jorem tribuat, non tamen in totum ſollici-  
tudinem perimis, nec ni dormiamus donata  
eſt, ſed ut ſuavius vigilemus.* Jam quod  
reliquum eſt, & perſpectiſſima Nobis an-  
tea erant Tua in Nos, & Apoſtolicam  
hanc B. Petri Cathedram ſtudii, conjun-  
ctionis, obſervantiæ, pietatiſque officia;  
& nunc adeo grata & jucunda eſt eorum-  
dem in Epistola tua locutiſſima confir-  
matio, ut nihil cupiamus magis, quam  
palati omnibus fatere poſſe, quantum Tui,  
Tuæque Dignitatis ac Virtutis rationem  
habeamus, quantumque ad ea omnia præ-  
ſtanda, quæ ad Tuæ laudis gloriæque in-

(1) *Epist. 93. Cap. 6. Part. 2. Oper. cit. Edit.*

crementa faciant , atque ab hujus S. Sedis beneficentia proficisci possint , potissimum incendamur . Interim Deum Opt. Max. precamur , ut cum ipse præstantium suorum meritorum suavor , impulsor , atque auctor extiterit , idem etiam esse suorum in Te munerum amplificator velit . Atque hujus divinæ benignitatis auspicem Apostolicam Benedictionem Tibi , Vene-

rabilis Frater , Tuæque fidei conceditū populis intimo paternæ Caritatis sensu amantissime impertimur . Datum Romæ apud Sanctum Petrum sub Annulo Piscatoris die XIX. Decembris MDCCCLXVIII. Pontificatus Nostri Anno Quarto .

*Benedictus Stay.*

Venerabili Fratri Joanni Nicolao Episcopo Myriophytano .

PIUS PAPA SEXTUS.

Venerabilis Frater , Salutem & Apostolicam Benedictionem . Quod summo tempore semper optavimus , quodque a Deo Optimo Maximo omni animi contentione precati sumus , ut Tu , Venerabilis Frater , cordis dolore tactus intrinsecus , tandem aliquando a suscepta jamdudum offensionis atque erroris semita Illius misericordie digradereris , Teque ipsum ad veræ doctrinæ lucem revocares ; id nunc contigisse & ex Litteris Venerabilis Fratris Clementis Wenceslai Trevirensis Archiepiscopi , & S. R. I. Principis Electoris , & ex transmissis Nobis Tuo Retractionis Libello incredibili paterni Nostri animi jucunditate intelleximus . Maximas extitisse Nobis a Te antea doloris , atque aegritudinis causas , ipse facile percipere potes ; cum Te nimirum intruerem hujus Apostolicæ Sedis beneficio ad Episcopatum evectum , ipsique tanto necessitudinis nomine devinctum , tamen insurrexisse ad eandem oppugnamdam , idque conari , ut ejus antiquissima jura , atque a Christo Domino derivata privilegia minueres , ac lahesctares . Divinis Nos sane freri promissionibus certissime confidebamus , solidissimam hanc Veritatis Petram nullis unquam adversis ventis ac tempestatibus concuti posse , atque ad ruinam impelli . Sed & Tuam dolebamus vicem , qui Te tantopere a Nobis averteres , atque aberrares ; & eorum etiam omnium errorem perniciemque deslebamus , quos ingenium tuum , amplaque eruditionis ,

ac doctrinæ species ad Tuas partes , hoc præsertim adversissimo Ecclesiæ ac Religionis tempore , facile pertraherat , atque aggregabat . Has pristinas gravissimas molestias perpetuasque sollicitudines Nostras non ideo nunc commemorandas suscepimus , Venerabilis Frater , ut Tibi quidquam exprobrare videamur , sed ut luculentissime declaremus , in quælo , quantumque illar jam converse sint gaudium , quamque ex ipsa superioris temporis recordatione sensus in Nobis Tuæ hujus revisionis fiat jucundior . Cognoscimus certe in Tuis hisce immutatis consiliis Dei virtutem , ac misericordiam , qui non reliquit Te usque in finem , sed novam Tibi mentem voluntatemque per Sanctum Spiritum immisit , atque indidit ; eique quantas maximas possumus intima Animi fide gratias persolvimus ; Teque etiam hortamur , ut hac ipsi debita Tuæ Religionis Officia in humilitatis sensu exhibere ac referre nunquam intermitas . Porro ut Tu ipse pro tanto beneficio , post Deum , unice obstrictus es eidem Trevirensi Archiepiscopo Tuo ; ita Nos itidem plurimum ipsi debere ultro profiteamur , qui sua tandem opera , Sapientia ac Virtute perfecit , ut Divina ope Te ad hanc Beati Petri Cathedram eum gemitu sistentes , implorares veniam , ad ejusque cultum , obsequium , ac reverentiam puro corde , & conscientia bona , & fide non sista redires . Hoc nimirum de Te persuadent Nobis , præter summam ejus amplissimi Viri auctoritatem , ipsa ratio Epistolæ ac Retractionis Tuæ , in qua

qua post plurima singillatim atque accurate expressa, a Teque revocata, Animum præteritorum omnium poenitentem exhibes, eumque in modum comparatum esse confirmas, ut cetera etiam, quæ non expresseris, contra Apostolicæ Sedis decreta, ac doctrinam a Te unquam prolata, statim ut admonitus fueris, Te ad veritatis normam redacturum esse pollicearis. Hoc optimæ voluntatis Tux testimonium Nos perlibenter fuscipimus; hoc certum tux constantiæ pignus esse existimamus. Proinde remittentes Tibi quascumque Canonicas & spirituales penas, Te, Venerabilis Frater, quod tam enixe a Nobis suppliciterque postulas, in Nostram, & Sanctæ hujus Sedis gratiam reconciliamus, ac restituimus; Tibi pacem, quam a Christo Domino didicimus, largimur; Tibi paterno amplexu occurrimus; Te inter Episcopos Collegas Nostros adnumeramus, atque amantissimis Verbis Filium etiam nostrum compellamus. Dum hunc Nostrum, ut vides, amorem Tibi tam prolixè deferimus, eundem etiam cum plurima tui commendatione ac laude jam nunc conjungere minime dubitamus; neque enim dissimulare possumus, in Tua hac Actione conspici a Nobis, & docilitatem ingenii, & magnitudinem animi Tui. Nam quid majus a Te fieri, quid fortius potuit, quam discussa errorum caligine, a pristina mentis elatione ad christianæ humilitatis sensum demitti, tuas abicere ac reprobare sententias, veritati posthabere exoriturus de Te rumores, Temetipsum quodammodo vincere, atque contemnere? Quod quanto difficilius est, humanæque Naturæ

vires excedens; tanto magis intelligimus abundare in Te divitias gratiæ & bonitatis Dei. Ita certe Boni omnes, quorum gravissima apud Te esse debent judicia, Nobiscum sentient, cum Nos, quæ operata sit in Te Dextera Domini, palam faciemus. Tu idem, Venerabilis Frater, illud nunc potissimum age, ut omnes Populi publica tua veritatis a Te agnitæ confessione, divinæque potentie celebratione, quid per ejus misericordie gratiam sis consecutus, intelligant. Maximum existima, atque opportunissimum illati a Febronio in Ecclesiam detrimenti futurum remedium, si Tu ipse, qui eos libros conscripsisti, eosdem, ut erant antea ad plurimorum ruinam, ita nunc ad ipsorum edificationem refutes, convincas, ac redarguas. Etsi prope jam ætate sis, integris tamen adhuc Te, Deo juvante, pollere cum Animi, tum Corporis viribus non ignoramus. Quid potius igitur, quid utilius, quid præstantius reliquo vitæ tempore facias, quam, ut qua manu vulnera Ecclesiæ atque Apostolicæ Sedi inflixisti, eadem illa ipsa alligere, ac perficere omni studio, ac labore contendas? Habes profecto plurimos, quos imitare, præcedentibus Ecclesiæ temporibus insignes & sanctitate & doctrina Viros, qui nedom prioris ætatis errata retractare veriti non sunt, sed eadem semel detecta constantissime rejicientes, maximam hoc ipso apud omnes suo nominis gloriam compararunt (1). Eja igitur, Venerabilis Frater, *exere vires*, Te ipsis S. Joannis Chrysostomi verbis excitamus, (2) *fortiter dimica, atrociter in prælio isto concerta, considera pactum, conditionem at-*  
ten-

(1) *Epist. Maximi, Urban. Sidon. & Machar. de suo reditu ex schismat. L. inter Epist. S. Cyprian. edit. Paris. cum adnotat. Pamel. ann. 1603. S. Augustinus in Prolog. lib. Retractionum. Tom. I. Oper. edit. Paris. Monachor. S. Mauri*: Neque enim quicquam, nisi imprudens, ideo quia mea errata reprehendo, me reprehendere audebit. Sed si dicit, non ea debuisse a me dici, quæ postea mihi etiam displicerent; verum dicit, & mecum facit. Eorum quippe reprehensor est, quorum & ego sum. Neque enim ea reprehendere deberem, si dicere debuisssem.

(2) *Serm. de Martyrib. Quod aut imit. aut non laudandi sunt. Tom. 3. Oper. edit. Parisiens. 1581. pag. 849.*

tende, militiam nosce; pactum, quod spondidisti; conditionem, qua accessisti; militiam, cui nomen dedisti: Tibi etiam S. Bonifacii Moguntini Episcopi, Germanique Apostoli, plenas auctoritatis voces subijcimus, quem Tibi ignotum esse non potest aliquantulum etiam ad Palatiolum Monasterium prope Treviros constitisse (1): Ille ad Zachariam scribens testatur, nihil tam se optare, quam Catholicam Fidem & Unitatem Romane Ecclesie servando dilatare, & quancumque audientes, vel discipulos in ista Legatione mihi Deus donaverit, ad obedientiam Apostolicæ Sedis invitare, & inclinare (2). Nos vero Tibi ipsum Zachariæ ad Bonifacium responsum datum: Domini deprecamur clementiam, li-

ces peccatores, ut suo Te muniat, & confortet auxilio, Nosque annuat prosperitatis tue semper lata suscipere nuncia (3). Demum pro Dei benignitate nova, semperque uberiora impoſterum a Te latitæ Noſtræ, Turque commendationis argumenta expectantes, Apostolicam Benedictionem Tibi, Venerabilis Frater, celeſtium munerum omnium auspiciem, in paternæ gratiæ, pacis, charitatisque amplexu, ex Animo, ac peramanter impertimur. Datum Romæ apud Sanctum Petrum sub Anulo Piscatoris die XIX. Decembris MDCCCLXXVIII. Pontificatus Noſtri Anno Quarto.

Benedictus Stay

*Hiſce abſolutis, præſatus R. P. D. Stay egreſſus eſt e loco Conſiſtorii; & Sanctiſſimus Allocutionem ſic proſecutus eſt.*

**E**X quibus omnibus præclare intellexiſtis, VENERABILES FRATRES, quid hac in re actum jam ſit; præcipue vero conſtare Vobis poruit, quam candido, ſincero, atque ingenuo animo in Cor ſuum ſe re-diſſe fateatur Febronius; &, quod animadverſi maxime debet, non temporali ullo commodo illeſtus, non virium infirmitate fractus, non ingenio debilitatus, nec moleſtis inductus ſuaſionibus, ſed ſola Veritatis agnitione permotus, ſola Supernæ Gratiz illuſtratione perſuſus, ſolo denique ſalutis ſuæ deſiderio incenſus, errores ſuos ſingulari ſtudio rejiciat, ſummaque contentione ejuret; ut retractationis Libellum, quem *PROPRIA MANU TOTUM PERSCRIBERE VOLUIT*, ſelectis *PATRUM AUCTORITATIBUS, ET RATIONIBUS ROBORARIT*. Nonne hæc eſt mutatio Dexteræ Excelli? Qui innumeris Charismaſum donis univerſum Eccleſiæ Corpus exornat, ut per multos unius luminis radios idem ubique ſplendor appareat, nec poſſit niſi gloria eſſe Chriſti, cujuſlibet meritum Chriſtiani (4). Neque enim exiguum id eſſe reputamus Episcopii Myriophytani meritum, qui ſanctiſſimos Job, & Davidem imitatus, nullam afferri ſibi moram paſſus eſt ab importuno, quo imbecil-

(1) *Brown. Annal. Trevirenf. Tom. I. lib. 7. num. 116. Bolland. Acta SS. Junii Tom. I. die 5. § 2.; deinde in 4. Vita ejusd. S. Bonifac. § 2.*

(2) *In Coll-ſt. Concilior. Labb. Tom. VI. pag. 1495. edit. Pariſienſ. 1671.*

(3) *In cit. Collect. Labb. pag. 1527.*

(4) *Sanctus Leo M. Serm. 63. cap. 7. Par. I. Oper. cit. Edit.*

les animi plerumque capiuntur, pudore errata sua confitendi ; sed summam ingenii docilitatem ac miram animi fortitudinem in damnandis sententiis suis, seque ipso pro veritate abjiciendo, declaravit. Audiatur hic Ambrosius, cujus verbis dum Febronii laudes cumulantur, vulgi stultitia detestatur: *Amicus Dei, Propbeta Dei, Rex ab ipso electus Deo, & unctus in Regnum, flagellus se spontaneus offerebat, nec erubescibat; & Tu erubescis? Non multum ista verecundia Tibi opitulabitur, cum ad Judicium Dei veneris: Sed pudoris Te istius pœnitebit, cum in conspectu non solum hominum, sed etiam Angelorum & omnium Potestatum Cœlestium constitutus, caperis peccata propria non negare... Non esset bodie in requie servulus meus Job, si erubisses iras illos Reges Amicos suos; nec ipse David, si erubisset, delicta propria confiteri. . . . Et quia uterque eorum non erubuit factorum suorum pretium in mea ponere potestate, meo se judicio voluntatique committere; nec Ego de talibus Servulis erubescam, ut appellem Amicos meos, qui meam studuerint facere voluntatem (1). Accedere etiam ad ipsius meritum debet, quod cum a perniciofa diffensione ipse jam discessisset, ab eadem iridem suo exemplo brevi abduclurum eos confidamus, qui hactenus illius, tamquam sui Ductoris, signa sunt secuti.*

Si Dioscori interitus, qui in sua lentiendi pravitate obiit, ut scribit Leo Magnus (2), in profundiora dejecit assecras ejus, & perfidia inextinctore sublato, instabiles quædam, & insipientes animæ habent, quod parvant, non habent, quod sequantur; quales nunc esse Febroniani debent, Auctorem suum videntes, non jam extinctum, sed immutatum, sed Sectatorum omnium in seipso damnantem errores? Habent illi adhuc quem sequantur, si ipso præeunte redire ad officium, ad sanitatem velint; sin renuant, & in sua defectione persistant, quid jam illis supererit, detracto Duce, nisi ut incerti paveant, confusi ut erubescant. Qui enim se a Romana Ecclesia sejungunt, in eaque constitutam Unitatem dividunt, dum amantissimæ suæ Matris sinum & amplexum recusant, omnem suam substantiam quasi profugi & inopes dispergunt. Verumtamen pergant illi, quas libuerit, fraudes insidiasque huic Ecclesie struere, atque inferre calumnias, &, ut magis adhuc obtrescant, Sæculi Potestatibus eandem obistere, atque adversari clament; tamen vel inviti agnoscant ac fateantur necesse est, quanta nunc iis auctoritatis species decesserit, quamque in apertum aggerata illa falsitatis commenta proferantur. Neque se magno similiter errantium numero tueri poterunt, sibi que de multitudine blandiri; ut enim Ambrosius egregie monuit (3): *Multitudo factorum impunitatem non facit criminum: Nam in Sodoma & Gomorra, & in totis quinque civitatibus innumerabiles utique habitabant Populi, & omnes pariter... igneis imbribus conflagravit.*

Nos

(1) Enarrat. in Psal. David. 37. n. 51. Tom. I. Oper. col. 838. Edit. Parif. Mo-nachor. S. Mauri.

(2) Epist. 111.

(3) Lib. de Laps. Virg. consecr. cap. 9. n. 41. Tom. II. Oper. col. 316. supracit. edit. Parisien.



Nos interea Myriophytanum Episcopum, qui manifesta professione a se abjecit, ac repulit quidquid in Scriptis suis Romana detestatur Ecclesia, & nihil simulatum, nihil obscurum, nihil ambiguum in sua Retractione intexit, diutius morari non possumus, quin, etsi magno a Nobis locorum intervallo divisum, in Spiritu Caritatis amplectamur; & ab ineffabili misericordia Dei non judicemus alienum, sed omnis culpæ abolitionem, & Apostolicæ pacis gratiam impertiamur: *Nullas patitur venie moras vera conversio; & in dispensandis Dei Donis non debemus esse difficiles; nec accusantium se lacrymas, gemitusque negligere, cum ipsam pœnitendi affectionem ex Dei credamus inspiratione conceptam* (1). Aliter, uti docuit per aptissimas similitudines Cyprianus (2), præcluderemus, atque abscinderemus iter doloris, ac pœnitentiæ viam; & dum fructus pœnitentiæ interceptitur, pœnitentia ipsa tollitur. Superemus enim Creator noster magis placatur voluntate, quam sanguine, ut ostendit in Abraham, cujus fidem in Filii oblatione requirivit; at si eum iussit offerri, tamen non permisit occidi (3). Huic nostræ voluntati magnum adjecit incitamentum Trevirensis Archiepiscopus, qui idipsum a Nobis summo studio postulavit. Ipsi non solum omnem habemus, pro sua amplitudine, ac virtute, fidem; sed tantum existimationis, caritatis, ac laudis pro innumeris suis in Ecclesiam meritis deferimus, ut incredibilem in modum illius studiis, illius gloriæ faveamus. Ejus maximæ, post Deum, in eximio hoc opere partes extiterunt; ejusdem Consilii, atque Actis, tam præclara incepta præclariora sunt exitus consecuti. Summa est præterea ipsius Nobiscum conjunctio, summa, erga Apostolicam hanc Sedem observantia. Quapropter dum ipsum debita hac prædicatione prosequimur, dum tantopere de sua pietate gaudemus; adhuc multo majore fiducia nunc ab ipso petimus, eumque obsecramus, ut pastorali Animo pergat Adversariorum machinamenta confringere, Coepiscoporum excitet diligentiam, ut quos eadem unitatis causa conjungit, eodem ardore inflammentur in revocandis iis, qui a veritatis semita inconsultius decurrarunt in suis Ecclesiis, ut ita *Domini ovile reparetur, & per sollicitudinem Caritatis atque doctrine, omnes Christi Oves unum se sentiant habere Pastorem* (4).

Hæc sunt, VENERABILES FRATRES, quæ in sinu Nostro diutius continere præ gaudio non potuimus, quin Vobiscum communicaremus; ut quos antea sollicitudinis, ac doloris socios habuimus, nunc consolationis Nostræ compotes participesque faciamus. Præclaram tribuit annunciandæ hujus lætitiæ opportunitatem, illamque potissimum augeat hæc ipsa solemnitas, quam celebramus, Reparationis dies (5), in qua *Rex pacis, cum sua pace procedens, su-*

(1) S. Leo M. *Epist.* 83. *Cap.* 4.

(2) *Epist.* 52. *juxta Edit. Parisien.* 1603.

(3) S. Petrus Chrysol. *Serm.* 108. *Edit. Lugdun.* 1627.

(4) S. Leo M. *Epist.* 141. *in fin.*

(5) Alexander PP. VI. uti proditum in Diario Burchardi Cæremoniarum Magistri, ha-

*fugavit omne diffidium, diffensiones depulsi, discordiam perturbavit, & sicut Caelum splendor solis, ita Ecclesiam fulgore pacis illuminat . . . ut nunc procedente Christo Rege pacis, omne quod triste est, auferatur a medio, & illucescente veritate, fugetur mendacium (1).*

Hic etiam apertissimus se obtulit Nobis ad vos alloquendum locus, e conspectu nempe gloriosæ Confessionis Principis Apostolorum, qui Petra est, ad quam eliduntur filii Babylonis; & obtinens cum æterno Sacerdote indeficiens confortium, Sedi suæ præesse non definit, ut omnino Febronii pœnitentiam ejus patrocinio referre debeamus.

Plurimam quoque jucunditatem attulit Vos alloqui e latere Corporis Magni Leonis, quo Christus utitur assertore; cujus scripta suavissima præbent legentibus spectacula; quemque *Advocatum, & Propugnatorem veritatis invenimus (2).*

Gloriemur itaque in Domino, VENERABILES FRATRES, & causam huic actionis ad originem suam, caputque ferentes, illi immortales gratias, illi laudem, gloriam, & honorem tribuamus, in cujus manu & hominum corda, & momenta sunt temporum.

habuit die 25. Martii 1498. Consistorium Secretum, recurrente Dominica quarta Quadragesimæ, *Letare* nuncupata, in quo providit nonnullas Episcopales Ecclesias. Benedictit Rosam auream; & deinde venit ad Cappellam majorem, in qua celebravit Missam Card. Perusinus.

Julius PP. II, telle Diario Paradis de Grassi Cærem. Mag., habuit Consistorium secretum in Aula Paramentorum die 23. Februarii 1505., recurrente Dominica tertia Quadragesimæ; & postea venit ad Cappellam, in qua Missam cantavit Archiepisc. Atheniens. Adsisens.

In Diario Phebei Cærem. Mag., A. 1646., legitur: *Feria 2. die 12. Mensis Martii, licet sit Festum Palatii, videlicet S. Gregorii Magni, tamen habitum est Consistorium Secretum, præsentibus triginta Cardinalibus; in quo proposita sunt tria: Ecclesiæ, & petiit Pallium pro Ecclesiâ Sirigoniens. &c. Hæc mane, cum Sanctissimus (Innocentius PP. X.) Curioni dixisset, quod hæc mane esset Consistorium; dictum est respondisse: Esse Festum Palatii, & ideo celebrari non posse Consistorium. Cui quam prudentissime Summus Pontifex, Possumus, inquit.*

Clemens XIII. die 24. Decembris 1767. mandavit indici Consistorium Secretum, dum cantabantur prim. Vesp. Nativitatis D. N. J. Christi; quibus expletis, habuit Consistorium in Aula Consistoriali Palatii Quirinalis, & gravi Allocutione exposuit necessitates Catholicæ Ecclesiæ, & decrevit Solemnem utriusque Cleri Supplicationem habendam die 28. ejusd. mensis, Fest. SS. Innocentium, in Basilica Vaticana. Cui idem Summus Pontifex cum Sac. Cardinal. Collegio, ac omnibus Romanæ Ecclesiæ Præfatis interfu.

(1) S. Petrus Chrysol. Serm. 129. cit. Edit.

(2) Theodoret. Episc. Cyr. ad S. Abund. Episc. Comenif. apud Baron. ad Ann. Christi 450. n. 33. Tomo 8. Annal. Edit. Lucens.